

Kampuchea: Pandangan PM tidak bertentang

KUALA LUMPUR, Khamis — Peserta-peserta Perhimpunan Pertubuhan Antara Parlimen Asean (AIPO) diberitahu pandangan Datuk Seri Dr. Mahathir Mohamad baru-baru ini mengenai isu Kampuchea tidak bertentangan dengan pendirian perwakilan Malaysia di perhimpunan pertubuhan itu.

Pandangan ini malah merupakan pendapat anggota-anggota Parlimen Malaysia dari kedua-dua Dewan Rakyat dan Dewan Negara.

Sebagai seorang anggota Parlimen, Perdana Menteri merasa perlu

bagi beliau membangkitkan isu tersebut di perhimpunan ahli-ahli Parlimen Asean.

Pandangan perwakilan Malaysia mengenai isu itu telah disuarakan di musyawarat jawatankuasa politik di perhimpunan itu berakhir di sini hari ini.

Menurut Presiden Perhimpunan, Tan Sri Syed Nasir semua perwakilan menyanjung pendirian dan pandangan Perdana Menteri mengenai hal ehwal Kampuchea.

Beliau berkata lain-lain peserta Asean telah menanyakan perwakilan Malaysia meminta pen-

jelasan mengenai kenyataan yang dibuat oleh Datuk Seri Dr. Mahathir mengenai kemungkinan Malaysia menimbang semula sokongannya kepada Khmer Rouge menduduki kerusi Kampuchea di Bangsa-Bangsa Bersatu.

Perdana Menteri ketika merasmikan perhimpunan AIPO ke-4 hari Selasa lalu telah menyuarakan rasa kesal dengan sikap setengah golongan yang tidak berusaha menyelesaikan masalah Kampuchea.

Beliau berkata adalah tidak bermakna bagi Malaysia menyokong kedudukan mereka di pertubuhan dunia itu.

Tan Sri Syed Nasir berkata isu Kampuchea termasuk kenyataan Datuk Seri Dr. Mahathir menjadi tumpuan perbincangan jawatankuasa politik itu.

Jawatankuasa itu mencadangkan perhimpunan agung AIPO meluluskan satu keputusan menyokong penuh deklarasi dan resolusi persidangan antarabangsa mengenai Kampuchea (ICK) yang memperuntukan satu rangka yang teguh dalam usaha mencari penyelesaian di Kampuchea.

Keistimewaan haruslah diberikan bagi membolehkan rakyat Kampuchea membuat keputusan sendiri menerusi pilihanraya bebas di bawah pengawasan Bangsa-Bangsa Bersatu, menurut rangka yang dicadangkan itu.—
Bernama.

No. Siri 2337

No. Penerimaan 81/85